



UNIVERSITÄTS-  
BIBLIOTHEK  
PADERBORN

## Universitätsbibliothek Paderborn

### Conciliorvm Omnivm Generalivm Et Provincialivm Collectio Regia

Ab anno DCCCLXXII. ad annum DCCCCIX.

**Parisiis, 1644**

Epistola CLXXIV. Ioannis Papae VIII. Ad Michaellem Regem Bvlgarorvm.  
Hortatur vt ad obedientiam Romanae ecclesiae, a qua seductus  
recesserat, cum sua gente reuertatur.

**urn:nbn:de:hbz:466:1-15967**

do proficisci facito. Præterea veridico multorum relatu longe lateque resonante didicimus, quod res & possessiones dilectæ ac spiritalis filia nostræ, & sancti Petri commendatæ Angelbergæ imperatricis sint a quibusdam malefactoribus omnimodis deprædata, non solum quæ foris extitere in agris & villis, sed etiam quæ intus per venerabilia, & non violanda loca sanctorum monasteriorum repositæ fuerant: pro quo scilicet tam immani scelere, nefandoque piaculo sanctimoniam tuam merito redarguimus. Quoniam sacerdotii tui officium est, male agentes auctoritate diuina corrigere, verbisque salubribus cohibere, ne tacendo tales, proh dolor! imitari potius quam prohibere videaris. Est enim ex hoc pessima fama vniuersum discurrens per orbem, quod dominam quondam, & imperatricem vestram, cui vestram fidem per iusiurandum dedistis, male tractatis, cui pristinum honorem, dignamque reuerentiam semper exhibere debueratis. Nunc itaque pro amore sancti Petri, sub cuius speciali defensione consistit, eam adiuuare non prætermittas, quousque sua omnia quæ iniuste perdidit, \* possit. Data vt supra.

\* f. des  
recupe-  
rate

## EPISTOLA CLXXIV.

## IOANNIS PAPÆ VIII.

AD MICHAELEM REGEM BVLGARORVM.

Hortatur vt ad obedientiam Romanæ ecclesiæ, a qua seductus recesserat, cum sua gente reuertatur.

*Dilecto filio Michaeli regi Bulgarorum.*

**Q**VIA vos omnipotens Deus dono gratuita misericordix suæ, gentemque vestram ad cognitionem sui nominis vocare dignatus est, meminisse debeatis hoc quod

*Math. 16.* Dominus beato Petro apostolo dixit: *Tues Petrus, & super hanc petram ædificabo ecclesiam meam:* cui vos in primordio Christianitatis vestræ ad regendum commisistis, eiusque successoribus ad obediendum. Sed nescio qua ratione ab eius magisterio, calliditate quorundam estis abducti,

*Galat. 3.* ita vt cum Apostolo dicamus: *Quis vos fascinavit ei non obedire, cui dudum colla summisistis?* aut illis credidistis, vt pace Græcorum loquamur, qui quotidie nouis, & variis

disciplinis, atque dogmatibus confunduntur? Sed quæso, fili carissime, ad sanctæ matris vestræ Romanæ ecclesiæ sinum, quæ caput est, instituyente Deo, omnium ecclesiarum in toto orbe diffusarum, relictis superfluitatibus, & seductionum scandalis, vos gentemque vestram amore mentis, sine mora reducite. Quia in tantum vos affectione paterna diligimus, vt in visceribus Christi Iesu esse cupiamus. Et ecce parati sumus, vt vos lucrifaciamus, & quidquid legatorum nostrorum offuscatione nuper offensum est, ad purum corrigere, & omnia maturissime redintegrando curare, & si contigerit non solum compati, & condolere vobiscum, sed etiam pro salute animarum vestrarum mori non recusabimus, dicente Ioanne apostolo: *Quoniam Deus pro nobis animam suam posuit, & nos debemus pro* 1. Ioan. 3. *fratribus animam ponere.* Vestræ tamen dilectioni conuenit monitis paternis benigno amore semper præbere assensum, & admonitionibus nostris accommodare auditum: quia ille, cui a Domino clauis regni calorum ligandi, atque soluendi collatæ sunt, quotidie & indefinenter expandit brachia, & vos reuertentes ad se gratulanter expectat; quatenus vos æterno pastori reddat compotes æternæ beatitudinis, a quo accepit ministerio sui apostolatus animas vestras redimere. Data vt supra.

## EPISTOLA CLXXV.

## IOANNIS PAPÆ VIII.

AD CONSILIARIOS MICHAELIS

REGIS BVLGARORVM.

Eiusdem argumenti.

*Petro, Cerbulæ, & Sundicæ, ceterisque optimatibus, & consiliariis dilecti filii nostri Michaelis regis Bulgarorum.*

**D**ENIQUE moneo vestram omnium dilectionem, vt continuis adhortationibus, atque suggestionibus dilecto filio nostro Michaeli glorioso regi seniori vestro annuntietis, vosque cum eo ad sinum sanctæ Romanæ ecclesiæ, quæ vos æternæ beatitudinis cupit esse participes, redeat, ac redeatis, ne diutius quorumdam peruersi dogmatis suasionibus perniciem, ac detrimentum, quod absit, animæ vestræ patiamini. quoniam nos in tantum amorem super vos

*Concil. Tom. 24.*

Aa ij